

讀離大師撰

毘尼止持會集

福建莆田廣化寺

讀體大師撰

毘尼止持會集

福建莆田广化寺佛经流通处

毘尼止持會集

凡例

一律分眾部。起自異執。哲人宏範。理合融收。按舍利弗問經中。舍利弗言。如來正法。云何少時分散如是。既失本味。云何奉持。少時者。謂佛滅度三四百年中。佛言。摩訶僧祇。其味純正。其餘部中。如被添甘露。諸天飲之。但飲甘露。棄於水去。人間飲之。水露俱進。或時消疾。或時結病。其讀誦者。亦復如是。多智慧人。能取能捨。諸愚癡人。不能分別。文是

知諸部之分。出乎異見。取捨之法。識自聖言。故茲集雖以曇無德部爲宗。然於他部互有發明者。悉採用之。此亦南山律祖集大成之式也。問。旣云摩訶僧祇。其味純正。何不宗之。反宗四分。豈非飲添水之甘露耶。答。茲藏中四十卷之僧祇者。上古諸師。皆判爲略本。故所不宗。蓋文少義闕。而又不合二百五十戒數故也。今宗曇無德四分律者。蓋是南山聖師之所宗。故自唐以降。皆宏通故。二百五十戒相。悉具足故。慙度有

歸無紊亂故。余今宗之。復何疑焉。

一律制嚴詳。譯文重沓。初機簡閱。不無浩繁之歎。今爲便覽。故節要文。然於義理。并無增損。

一戒因事制。有緣方興。故於條下。先出犯緣。須知梅檀林中。曾無散木。靈山會上。豈有凡夫。斯皆大權示現。密護僧倫。請佛制戒。助揚法化。如閱讀者。當生欽信。慎勿眇視。以取慢尤。故善見毘婆沙律云。若長老聞此不淨行。慎勿驚怪。何以故。如來憐愍我輩。爲結戒故。說此惡言。若不說

者。云何得知波羅夷。偷蘭遮。突吉羅。若法師爲人講聽者。慎勿露齒笑。若有笑者。驅出。何以故。佛憐愍眾生。金口所說。汝等應生慚愧心。聽何以笑。

一諸部翻譯。音雖不同。義實無別。由其五天各異語。有重輕。今皆倣古所述。或註文下。或贅卷末。以省檢討。

一五篇戒相。各有根本等流。性罪遮罪。並所起煩惱。性謂本性是罪。遮謂因制方犯。又性罪惟染

心中作若遮罪通染不染惟薩婆多論明其本流獨善見律判其性遮據律攝中出其煩惱今於每戒下有無咸依藏錄一無私增若準義推例亦可曉

一每戒之下約有八科一制戒緣起二依律釋文三結罪重輕四兼制餘眾五應機隨開六會採諸部七經論引證八附事便考然此八科有無不定臨文自見至於戒條正文書皆頂格餘者俱下一字若用本部但標律云或第幾分等字

若用他部則別標名以識之便於稽考藏函

一律有止作二持止持惟顯開遮之法作持方攝誦戒之規有依佛陀耶舍所譯說戒別本而成集者斯乃用別集廣止作不分今此集專覈止持一門故但明二百五十戒相所以卷首不錄布薩偈文和白等法至於作持說戒篇中自當錄附釋之庶無糅於止作也

一經通餘說律唯佛制等覺已下猶非所堪況諸小聖輒敢措詞良以如來行果極圓窮盡眾生

輕重業性。是故毘尼唯佛制立。自餘下位。但可依承。不同經論。許容他說。故余欽此。無敢穿鑿。釋義出事。皆如律藏成文。重治輕開。咸遵金口所說。

綱要

一經教利生。普被諸有。或在天上龍宮。或居祇園鷲嶺。或在王臣舍宅。或於曠野林泉。惟觀根器。應緣化導。凡從聽者。曾無遮揀。律則不爾。若於他處有犯。必在僧中結戒。縱尼有漏制。亦憑僧

一則令諸比丘。慚愧欽遵。謹護無作。次則遮障外人。恐生譏嫌。不敬僧倫。是故毘尼乃佛內制。獨大僧持。猶如國王秘藏。匪許外臣所知。若白衣沙彌。設先覽者。後欲登壇。不聽進具。由犯賊住。是名重難。所以戒因緣經序云。天竺持律。不都通視。唯諸十二法人。堅明之士。乃開緘滕而共相授。耶舍見囑。見誨諄諄。人可使由之。不可使知之。其言至切。乃自是也。又邇來義學。兼講僧律。不揀白衣沙彌。槩容坐聽。雖云法施。實爲

犯法欺侮嚴制。罪將焉逃。所冀凡爲師承。及居上座。若睹白衣沙彌。翻閱律部。並此集者。當慈語教誡。使勿披覽。此則自他俱利。法道可昌。

一戒德難思。功逾眾行。初因極果。以爲元基。淨邦樂報。以爲根本。險途示迷。此爲良導。苦海得濟。此爲舟航。由是賢聖所修。諸佛所證。乃至天暫樂。惡道永離。無越乎戒。故我釋迦世尊。始自鹿苑。終於鶴樹。五時所演。一大藏教。多讚戒法。不特一佛推重毘尼。卽十方三世一切如來出

現利生說法皆然。若離戒修行。冀超三界。猶無足欲行。無翅欲飛。無船欲渡。詎可得也。

一戒有三種。果因互成。論得不同。據用則共。謂第一波羅提木叉戒。卽律儀戒。第二禪戒。卽定共戒。定是靜攝。入定之時。自然三業調善。諸惡不起。第三無漏戒。卽道共戒。道是能通。發真以後。自無毀犯。如初果耕地。蟲離四寸。是道共力。此二戒法。既是心上勝用。力能發戒。道定與律儀並起。故稱爲共。今毘尼藏。正詮律儀。亦攝定道。

由持淨戒。禪定智慧。功德發生。則律儀爲因。定道爲果。由禪無漏力。性業遮業。悉得清淨。則木叉爲果。定道爲緣。故律中令諸比丘。增心增慧。薩婆多論云。此波羅提木叉戒。若佛出世。則有佛。不出世。則無。禪無漏戒。一切時有。波羅提木叉戒。從教而得。禪無漏戒。不從教得。又波羅提木叉戒。但佛弟子有。禪戒。外道俱有。夫能維持佛法。有七眾在世間。三乘道果。相續不斷。盡以波羅提木叉而爲根本。禪無漏戒。不爾。是故於

三戒中。最爲殊勝。

一持律者。須知輕重開遮。決斷疑悔。始令正法久住不斷。故第四分云。有五法名爲持律。一。知犯。二。知不犯。三。知輕。四。知重。五。廣誦二部戒。又五法。四如前五。廣誦毘尼。又五法。四如前五。謂住毘尼而不動。又五法。四如前五。諍事起。善能滅除。又善見律云。律師有三法。一本毘尼藏。謂爲律師者。必本於毘尼。諷誦通利。句義辯習。文字不忘。然後可以教授於人。所以稱之爲律師也。

二。堅持不雜。謂爲律師者。當懷慚愧。堅持法律。於毘尼藏。所有文句義疏。悉皆通達。若有問者。次第而答。不相雜亂。所以稱之爲律師也。三。受持不忘。謂爲律師者。於毘尼藏所傳之師。須知次第授受之由。若佛授優波離。如是次第。師師相承。乃至於今。其名字或能盡知。或知一二而不忘失。所以稱爲律師也。

一比邱戒相。雖曰小乘。然學大乘者。未有不遵。故南海寄歸云。大乘小乘。律檢不殊。齊制五篇。通

修四諦。若禮菩薩。讀大乘經。名之爲大。不行斯事。號之爲小。所云大乘無過二種。一。則中觀。二。乃瑜伽。中觀則俗有真空。體虛如幻。瑜伽則外無內有。事皆唯識。斯並咸遵聖教。孰是孰非。同契涅槃。何真何僞。意在斷煩惑。濟眾生。豈欲廣致紛紜。重增冗結。依行則俱昇彼岸。棄違則並溺生津。西國雙行。理無乖競。又云。淨囊不洩。乃是菩薩本心。勿輕小愆。還成最後之唱。理合大小雙修。方順慈尊之訓。防小罪。觀大空。攝物澄

心何過之有。或恐自迷誤眾。準教聊陳一隅。空
法信是非虛。律典何因見慢。

一今所集卷專爲初學。若爲師者。切莫樂簡厭繁。
僅閱斯帙爲盈。須覽全藏博究二持。庶可高樹
戒幢。大振法鐸。苟未徹詣。急欲師人。多乖聖制。
律有大呵。

序

夫毘尼是正法之壽命者。蓋由戒淨僧眞。性遮之業而無染覆。道宏德備。權實之教而克闡揚。自行利他。越苦海而登彼岸。紹先啟後。續慧命以振玄猷。故曰毘尼住則正法住也。不然則五邪罔禁。八穢殉身。虧僧寶之尊稱。失福田之淨德。上無模楷。下闕規繩。縱能聚眾匡徒。悉屬附法魔外。欲令正法久住。豈可得乎。體匏繫荒隈。學慚往哲。謬承先囑。力樹戒幢。因念律海汪洋。學人難討。爰搜諸部之精要。詳明止持之

大成。雖未盡源。庶幾便覽。所冀同志諸賢。須遵七聚嚴護以防非。當欽四依知足而進道。則五濁世戒香芬馥於大地。六和眾法雨霑澤於人間。所謂毘尼住世則正法住世。不亦然乎。

時

順治己丑年前安居日滇南雞足苾芻讀體識於寶
華山之觀西軒

毘尼止持會集卷第一

金陵寶華山宏律沙門讀體集

將明斯律。依賢首宗略開七門。一。教起因緣。二。藏乘所攝。三。教義通局。四。辯定宗趣。五。教所被機。六。總釋題目。七。別解戒相。所言門者。收攝無壅。名之爲門。俾依門入解。通達無滯。凡所釋義。則有所宗歸也。

初教起因緣者。有通有別。所言通者。謂如來惟爲一大事因緣。出現於世。則一代時教。總其大意。惟

欲眾生開示悟入佛之知見。今此律者。欲令眾生以波羅提木叉戒。入佛知見故。故謂之通。

別則專就此律。復有十義。爲教起所因。一。攝取於僧。二。令僧歡喜。三。令僧安樂。四。未信者令信。五。已信者令增長。六。難調者令調順。七。慚愧者得安樂。八。斷現在有漏。九。斷未來有漏。十。正法得久住。一。攝取於僧者。謂於世人眾姓之內。若有篤信男女等。入正法中。深生敬信。樂爲苾芻。以成僧眾。令取僧寶果故。

二。令僧歡喜者。律攝云。爲僧伽極善。謂既入善說法律之中。

而知僧尊堅固道志。暢悅持戒。蕩滌凡情。能令善

法極增勝故。

三。令僧安樂者。謂依禁戒清淨活命。三慧自淑。五

邪不干。以七法財。還信施債德業漸增。不爲施所

墮故。

四。未信者令信者。謂持禁戒。性遮清淨。四儀整肅。

譏誚不興。令未信者。知歸佛道。使邪見輩。正信發

生故。

五。已信者令增長者。謂嚴淨律儀。梵行可軌。如教

化利。慈威可欽。能令久淹佛法者。景仰歸從。愈增

淨信故。

六。難調者令調順者。律攝云。爲折伏惡人。謂有一類名字比

邱。及一類雖具信心。煩惱業習強者。今以輕重律

儀諫治調伏。令知非自責。隨順眾僧故。

七。慚愧者得安樂者。謂清淨律儀。調難調者。令知

足慚愧。樂持戒僧。一界六和。身心無擾。得適悅進

道故。

八斷現在有漏者。謂諸惡發業。皆由潤生。今以淨戒防止功用。能違現行。乾枯業種。不起煩惱。斷除苦因故。

九斷未來有漏者。謂依淨戒。定慧發生。心無染污。永斷漏種。不受後有。得證僧寶果故。

十令正法久住者。謂令清淨僧寶。種性相續不息。如法宣說。廣利人天。展轉相教。正法得以久住故。以上別中十義。皆準律攝釋者。是爲此教結制之因。薩婆多云。如來以此十義結戒者。順此十利。

功德。得此十利功德。若持一戒。將來得一戒果報。兼得十利果報。如是一切戒當分別。而非一切通得此十利功德也。初明教起因緣竟。

二藏乘所攝者。已知此戒有如是因。未審藏乘之中。各何屬攝。先明藏攝。次明乘攝。

先明藏攝者有二。一三藏。二二藏。且初三藏者。

一修多羅。或云修妬路。亦名素咀纒。此翻契經。契者契理契機。經者以貫攝爲義。貫謂貫穿所應知義。攝謂攝持所化之機故。此教於三學中所詮定。

學。二毘奈耶。此翻調伏。謂調練三業治伏過非。亦名鼻奈耶鼻翫去。奈耶翫眞去。若干非而就眞。故曰眞也。降伏此心。息此心。忍不起。故曰眞也。降伏。戒也。息。定也。忍。智也。亦名毘尼翫滅。又云調御。使心行調善也。此教於三學中。所詮戒學。三阿毘達磨。舊云阿毘曇訛也。阿毘是對義。達磨法義。合言對法。謂能對者是妙慧。通漏無漏所對者是法。通世出世法。此慧對向涅槃法。復能對觀了四諦法。法之所對。故名對法。此教於三學中。所詮慧

學。梵語比吒。此云藏。卽包含攝持之義。非藏無以積錢財。非藏無以蘊文義。故上三典。皆名曰藏。今此戒者。正屬毘奈耶藏。非如他經分攝故。

二藏者。一菩薩藏。二聲聞藏。不列緣覺者。攝歸聲聞故。今此戒者。正屬聲聞藏。亦分攝菩薩藏。蓋聲聞人未發大心。容可不學菩薩戒。而菩薩人未有不學聲聞戒故。

次明乘攝者。乘有五乘。一人。二天。三聲聞。四緣覺。五菩薩。乘者。運載爲義。通教理行果。謂依教解理。

依理起行。依行證果。行果正運。教理助運。五皆名乘。由力有大小。載有遠近。故分爲五。一。人乘者。涅槃經云。多思慮。故名。人。雜心論云。意寂靜。故名。人。謂受三皈五戒。修下品十善。運載眾生。越於三途。生於人道。其猶小艇。纔過溪澗。二。天乘者。俱舍論云。光潔自在。神用名天。謂受持三皈五戒。修中品十善。非定相應。運載眾生。越於四洲。生欲界天。與四禪定相應。生色界天。與四空定相應。生無色界天。猶如小船。越於江河。三。聲聞乘者。聲謂

佛音聲。聞謂耳根發識。聽聞佛聲。四諦之法。故名聲聞。四。緣覺乘者。以慧覺了十二因緣之法。亦名獨覺。謂出無佛世。雖不稟至教。自悟無生。故名獨覺。修四諦十二因緣法門。皆能運載眾生。越於三界。到有餘涅槃。成阿羅漢。及辟支佛。皆如大船。越大江河。五。菩薩乘者。梵語具云菩提薩埵。菩提覺義。薩埵有情義。合言覺有情。以悲智爲本。修六度法門。運載眾生。越於三界。三乘之境。至無上菩提。大般涅槃之彼岸。如乘大船。越於大海。今此

戒者。正攝聲聞乘。非餘乘所攝。二明藏乘所攝。竟三教義通局者。已知藏乘所攝如是。未審教義當復云何。其中分二。初約教局論。次推義通論。

初約教局論者。世尊一大時教。有稱性隨機權實開會。方便演說。義各淺深。今依賢首所判。不出五教。一。小教。此教以隨機故。但說人空。不說法空。縱說法空。亦不明了。但依六識三毒。建立染淨根本。唯論聲聞乘。故名爲小教。二。始教。由第二時。但明於空。未盡大乘法理。故名之爲始。第三時定

說三乘。不言定性聲聞。無性闡提成佛。故亦名分教。於中廣說法相。少說法性。所說法性。亦是相數。是大乘之初門。故曰始教。三。終教。言定性聲聞。無性闡提。悉當成佛。方盡大乘至極之說。名之爲終。以稱實理。亦名爲實。於中少說法相。多說法性。雖說法相。亦會歸性。是大乘終極。名爲終教。四。頓教。此教明一念不生。卽名爲佛。不依地位漸次。而說名之爲頓。於中不說法相。唯明真性。一切所有。唯是妄想。一切法界。唯是絕言。名爲頓教。五。